



---

## **Directivas davart la finanziaziun speziala "sport" concernent contribuziuns pauschalas per la lavur generala da federaziun e d'uniun**

Sa basond sin l'art. 31 lit. a da l'ordinaziun davart la promoziun dal sport e dal moviment (ordinaziun da promoziun dal sport) dals 7 da fanadur 2015,

relaschadas dal departament d'educaziun, cultura e protecziun da l'ambient ils 19 d'avust 2015

---

### **Art. 1 Pajament da contribuziuns pauschalas annualas**

<sup>1</sup> A las commembras ed als commembers da la federaziun da tetg dal sport grischun pon vegnir pajadas contribuziuns pauschalas annualas per la lavur generala da federaziun e d'uniun, per curs da scolaziun e da sport da tut gener, per acziuns e per projects che promovon il sport da massa sco er la giuventetgna.

<sup>2</sup> A la federaziun da tetg dal sport grischun po vegnir pajada ina contribuziun pauschala per sia lavur generala da federaziun.

### **Art. 2 Inoltraziun e tractament da las dumondas a) adressat**

<sup>1</sup> Las dumondas ed ils documents per survegnir contribuziuns ston vegnir inoltrads al post ch'è inditgà sin il formular da dumonda correspondent.

### **Art. 3 b) agiuntas**

<sup>1</sup> A la dumonda ston vegnir agiuntads ils suandants documents:

- a) talun d'annunzia;
- b) tabella da retschertga;
- c) cedel da pajament.

### **Art. 4 c) termin d'inoltraziun**

<sup>1</sup> Las indicaziuns davart il dumber d'uniuns e davart il dumber da commembras e commembers ston mintgamai vegnir inoltradas fin ils 15 d'october cun il formular d'annunzia uffizial al post inditgà (decisiva è la data dal bul postal resp. da l'e-mail).

<sup>2</sup> En cas d'indicaziuns inoltradas memia tard u en cas d'indicaziuns incumpletas na vegn pajada nagina contribuziun pauschala annuala.

### **Art. 5 d) decisiun davart il pajament da contribuziuns pauschalas annualas**

<sup>1</sup> La regenza decida davart l'autezza da las contribuziuns.

<sup>2</sup> La decisiun vegn communitgada en scrit a las petentas ed als petents.

#### **Art. 6 e) basa per fixar la contribuziun**

<sup>1</sup> Las contribuziuns pauschalas annualas a las commembras ed als commembers da la federaziun da tetg dal sport grischun vegnan eruidas sin basa dals suandants parameters:

- a) dumber da las uniuns;
- b) dumber da las commembras e dals commembers activs sur 20 onns;
- c) dumber da las commembras e dals commembers activs sut 20 onns;
- d) activitads da G+S inclusiv il sport d'uffants da G+S e la promoziun da la generaziun giuvna da G+S tenor la statistica da l'uffizi federal da sport.

<sup>2</sup> La contribuziun a la federaziun da tetg dal sport grischun vegn eruida sin basa dal rapport annual e dal rendaquint.

#### **Art. 7 f) examinaziun dals documents**

<sup>1</sup> Il documents inoltrads vegnan controllads da l'uffizi per la scola populara ed il sport.

#### **Art. 8 g) pajament**

<sup>1</sup> Las contribuziuns pauschalas annualas che vegnan fixadas da la regenza vegnan pajadas il cumenzament da l'onn.

#### **Art. 9 h) comunicaziun da la contribuziun pauschala annuala**

<sup>1</sup> Las retschavidras ed ils retschaviders da las contribuziuns ston publitgar las contribuziuns pauschalas annualas en lur quint annual.

#### **Art. 10 Cundiziun**

<sup>1</sup> Il pajament da contribuziuns pauschalas è collià cun la cundiziun da represchentar las marcas «grischunSPORT» e «Swisslos» en moda adequata. Banderas u models da stampa correspondents pon vegnir retratgs dal post ch'è inditgà sin il formular da dumonda correspondent.

#### **Art. 11 Recurs**

<sup>1</sup> Cunter las decisiuns da la regenza poi vegnir fatg recurs tar la dretgira administrativa dal chantun Grischun, Obere Plessurstrasse 1, 7000 Cuira, e quai entaifer 30 dis dapi la comunicaziun da la decisiun contestada.